

Rapport dalla sessiun dil cussegl da vischnaunca dils 06-05-2013

Tractanda 1

Approbaziun dils protocols dallas sessiuns dils 21-01-2013 e dils 22-04-2013

Ils protocols dallas sessiuns dils 21-01-2013 e dils 22-04-2013 vegnan approvai en votaziun unanima cun engraziament.

Tractanda 2

Render quen per 2012

- a) **Orientaziun e discussiun**
- b) **Rapport dalla cumissiun da gestiun**
- c) **Approbaziun da quen e bilanza**

Il president communal Donat Nay presenta ils cavazzins impurtonts dil quen communal digl onn 2012 sco suonda:

Il quen current siara cun expensas totalas da frs. 11'914'892.14 ed entradas totalas da frs. 12'314'247.14, pia cun in gudogn da frs. 399'355.00. Igl ei vegniu fatg amortisaziuns ordinarias ell'altezia da frs. 795'925.45, amortisaziuns supplementaras da frs. 3'276'621.25, amortisaziuns da frs. 16'854.80 tier il quen da canalisaziun Trun, frs. 16'295.40 tier il quen da canalisaziun dalla fracziun Schlans, frs. 12'000.00 tier l'ovra hidraulica Runcalatsch. Plinavon ei vegniu mess la summa da frs. 39'384.18 en il deposit per la finanziaziun speciala dalla canalisaziun, frs. 1'103.10 en il deposit da providiment d'aua per la fracziun Schlans e frs. 60'000.00 el fondo da remessa da meglieraziun. Il gudogn avon amortisaziuns (cashflow) munta à frs. 3'773'411.03.

Quei quen extradordinari ei staus contonschibels entras la contribuziun da fusiun en la grondezia da frs. 975'000.00 e sin fundament dallas entradas ord la vendita d'energia ed ils tscheins d'aua ch'ei stadas fetg aultas muort igl ordvart bien onn hidraulic.

Per la presentaziun dil quen vegn surdau il plaid al canzlist communal. Plazi Decurtins presenta il quen per 2012 en detagl.

Tier il quen d'investiziuns eis ei veseivel che la vischnaunca ha danovamein saviu procurar per dabia lavur. Las investiziuns bruttas contonschan igl importo da frs. 1'278'186.65. Las entradas muntan à frs. 1'015'778.15.

Las grondas posiziuns secloman:

•	Sanaziun vias communalas	frs.	356'050.30
•	Sanaziun via Plauna e via Lavinal en la fracziun da Schlans	frs.	97'441.15
•	Sanaziun dalla via cantunala tras il vitg da Schlans	frs.	87'452.65
•	Cumpart meglieraziun Schlans	frs.	197'488.00

Allas damondas che vegnan tschentadas ord il cussegl san suprastanza e canzlist rispunder per cuntentientscha dallas petentas e dils petents.

Il president dalla cumissiun da gestiun Enrico Mazzetta rapporta davart la lavur dalla cumissiun.

A caschun da diversas sedutas ha la cumissiun da gestiun priu enconuschientscha dallas decisiuns dalla suprastanza communal sco era da quellas dil cussegl da vischnaunca. La cumissiun da gestiun ha saviu constatar che las decisiuns pridas ein vegnidas exequidas. Il quen communal ei plinavon vegnius examinaus e revedius tras il representant digl uffeci da vischnauncas dil Grischun.

Cumissiun da gestiun ed uffeci da vischnauncas dil Grischun recamondan l'approbaziun dil quen cun admetter il meritau engraziament e dar scarica als funcziunaris responsabels ed als collaboraturs dall'administraziun.

Sin fundament dallas examinaziuns dalla cumissiun da gestiun e la revisiun dil quen ch'ei succedida tras il representant digl uffeci da vischnauncas dil Grischun propona la cumissiun da gestiun:

- **d'approbar il quen 2012 che siara cun in gudogn da frs. 399'355.00**
- **da dar scarica als responsabels dall'administraziun communal ed alla suprastanza communal admettend a tuts il meritau engraziament per lur buna lavur e quitau per ils fatgs communal**
- **da dar scarica a tuts funcziunaris ed emploiai communal renconuschend la vasta lavur prestada**

Cun 13 : 0 vuschs approbescha il cussegl da vischnaunca il quen communal digl onn 2012 tenor la proposta dalla cumissiun da gestiun cun resalva dil referendum facultativ.

Il quen communal va en stampa e vegn silsunter surdaus allas casadas.

Tractanda 3

Verificaziun dil resultat dalla votaziun communal dils 03-03-2013

Cusseglia David Tiri declara che Flurin Decurtins ed el hagian sco commembers dalla cumissiun per verificaziun da votaziuns communalas controllau ils resultats dalla votaziun communal "Lescha davart la purificaziun dallas auas piarsas" ed anflau tut en uorden. En num dalla cumissiun propona David Tiri da verificar ils resultats publicai.

En votaziun unanima verifichescha il cussegl ils resultats publicai dallas elecziuns dils 03-03-2013.

Tractanda 4

Pusseivladad da tschentar damondas

Dalla pusseivladad da tschentar damondas vegn fatg diever.

Per il cussegl da vischnaunca

Il president

Flurin Decurtins

Igl actuar

Plazi Decurtins